

15/03/2000

Pameran sedekad Lada

LANGKAWI, Selasa - The New Straits Times Press (Malaysia) Berhad (NSTP) akan mengadakan pameran bergambar sempena sedekad penubuhan Lembaga Pembangunan Langkawi (Lada), bulan depan.

Pameran yang dijangka berlangsung selama tiga bulan itu akan menunjukkan detik sebelum Langkawi diisytihar sebagai pulau bebas cukai dan pembangunan yang dicapai kini.

Gambar itu adalah rakaman jurugambar Berita Harian dan New Straits Times sepanjang membuat liputan di pulau peranginan ini.

Pengurus Besar Lada, Datuk Abdul Halil Mutalib, berkata ia adalah antara 16 program menarik sempena ulang tahun penubuhan Lada pada 1 April ini.

Katanya, sambutan dimulakan dengan Forum Perdana pada 2 April yang membincangkan permasalahan semasa agama Islam di Masjid Al Aishah, Sungai Mengulu.

"Ia diikuti Larian Bulan Perdana, Pertandingan Golf Jemputan, Hari Puisi, Pesta Langkawi, Pertandingan Memancing, Ekspedisi Bermotor ke Bangkok, Perlumbaan Jetski dan Pesta Pantai.

"Bagaimanapun, kita belum menetapkan tarikh sebenar program tetapi ia akan diadakan sama ada pada Sabtu pertama atau Sabtu ketiga setiap bulan bagi memastikan mereka yang berada di tanah besar turut berpeluang merayakannya," katanya di sini, hari ini.

Pengisytiharan Langkawi sebagai Pulau Bebas Cukai pada 1 Januari 1987 adalah formula yang diilhamkan Perdana Menteri, Datuk Seri Dr Mahathir Mohamad untuk menjadikan pulau ini satu destinasi utama pelancongan di negara ini.

Menyedari banyak perkara perlu diselesaikan untuk merealisasikan matlamat itu, Lada ditubuhkan pada 1 April 1990 bagi membolehkan pembangunan infrastruktur seperti jalan raya, jeti, bekalan air, elektrik, sistem telekomunikasi dan lapangan terbang di Langkawi dilakukan dengan lebih terancang.

(END)